

Sco dessert plets main serius

S-chanf: Festa per il nov president dal cussegl grond

DA GION NUTEGN STGIER / ANR

■ **Da buna luna tar la festa per il nov president dal cussegl grond Duri Campell en sia vischnanca eran cunzunt ils schefs da fracziun. Ina giada dapli han els divertì l'entira societad da festa cun lur plets main serius. Els han confermà che politica sa er esser divertenta.** In dals puncts culminants tar las festas per il nov president dal cussegl grond èn adina ils plets dals schefs da fracziun da las partidas. Quel di vegn cunzunt betg sa tegnì als princips protocolars e cunzunt nizzegià l'ocasiun da dar als adversaris politics ina morsa ubain ina piztgada en furma plitost umoristica. A pled vegn dentant er il president da la regenza ed er per quel vala quel di il motto: legria enstagl dir insatge en tutta seriusadad. Uschia ha er *Mario Cavigelli*, cusseglier guvernativ ed actualmain president da la regenza, procurà per ina risada cun ses gegls main serius.

Origen: In teater cun Vincent Augustin sco suflader

Mario Cavigelli ha raquintà a la raspada dals mails ch'el haja retschet ils davos dis. In votant haja scrit che la Partida cristiandemocratica saja en vair senn ni mieur ni uschè, ultra da quai sco ina ampla da traffic, ni cotschna ubain verda ed ils plets «stop» e «go», quels correspundian er betg al profil politic da la pcd. Sin fundament da quels aspects saja la pcd qua tras la partida ideala per ina colliaziun da glistas tar las elecziuns naziunalas da l'onn proxim. Plaschair haja el gi dal mail da *Giovanni Netzer*, l'intendant dal Origen Festival Cultural. El haja engrazià cordialmain per il sustegn finanziel supplementar ed enviadà l'entira regenza a Riom. Sia pli nova produenziun religiosa sa numna: «Wer schon hat, dem wird mehr gegeben».



En ils plets dals schefs da fracziun è er l'antierur deputà Vincent Augustin adina puspè stà in tema tar la festa da sonda passada a S-chanf per Duri Campell, il nov president dal cussegl grond.

FOTO G. N. STGIER

Sco suflader segna tar quel nov teater *Vincent Augustin*.

Meglier in da la pbd che in da la pps

Mario Salis, il nov deputà engiadinais da la Partida populara svizra è er sa drizzà a la societad illustra. El suppona che *Duri Campell* vegnia a spustar la chatscha dals tschiervs da curuna ed integrar quella en la chatscha supplementara il mais da november. Tar quella saja lubì da sajettar bunamain tut quai che vegnia davant la flinta. Surstà saja el dentant er stà d'ina brev dal ami da partida Max, ha ditg Mario Salis. Quel haja scrit ch'el sortia da la pps per davantar da nov commember da la Partida burgais-democratica. Immediat haja el telefonà a l'ami da 90 onns per savair la raschun da sia demissiun sco

commember da la pps. Max haja ditg il suandant: «A mai stat pli a cor sche in da la pbd ha dad ir che in da la pps.» A *Romano Kunz*, il schef da fracziun da la Partida liberaldemocratica, è crudà en egl che cusseglier *Hansjörg Trachsel* saja dapi in temp pli ventiraivel che er gia. La raschun saja simpla: Dapi diesch onns haja el ussa preparà sia pensiun.

Sco ti fas politica èsi adina in putgà

Er *Marcus Caduff*, il schef da fracziun da la pcd, ha tegnì allegher ils bunamain 200 giasts en la tenda a S-chanf. Il Lumnezian ha ditg ch'in enconuschent politicher dals verd-liberals haja scrit a l'uestg: «Èsi putgà da far politica la dumengia?» La resposta da l'uestg saja stada curta e buna: «Sco ti fas politica èsi

adina in putgà.» Ultra da quai ha Marcus Caduff ditg che per la pcd haja ussa cumenzà ina nova epoca, l'epoca senza il grip (Urgestein) Vincent Augustin. Il parlament grischun sa laschia er cumparegljar cun in'orgla: 120 tschivlots e tschintg primtschivlots. Als novs deputads ha Marcus Caduff cusseglià da betg chavar il nas cun il det, cun ils schurnalists er savens far bleras fotografias durant las sessiuns. Il privel fiss avant maun ch'in schurnalist scrivesse sco legenda tiers quella fotografia: «Er holt das Beste aus sich raus.» Nagins commembers da la pps fetschian plets cruschads e da tuttas sorts concorrenzas e quai be per ina raschun: Els hajan tema da gudagnar in viadi a l'exteriur, ha ditg Marcus Caduff a la fin da ses plets plain umor.